

四庫全書

史部

欽定四庫全書

閩中理學淵源考卷三十六

廣平府知府李清馥撰

溫陵傅季謨先生定保學派

按宋元間學術派別棼如惟文公之學遞傳不失元

代趙公仁甫并姚許竇劉諸公倡明於燕北何王金

許衍派於金華二胡

一桂炳文

定宇

陳櫟

纂述於新安熊

永

陳

普林

以辨

丘葵

傳薪於閩海外此若郭公陞歐陽公仇

傳公定保盧公琦黃公清老丘公富國鄭公獻翁鄭公杓黃公鎮成練公耒李公學遜吳公海亦皆晦跡甌閩或優游教席或避世杜門確守師說是奮是程若湖湘之際真氏常言淵源最正考仁甫趙公以遺俘北行餘亦寥寥式微矣四明之學南渡後宗陸說者多其崇朱子之學者獨黃氏震史氏蒙卿迨元程氏端學端禮亦篤信朱說江右之學如熊氏朋來熊氏良輔董氏真卿亦朱門派的至草廬先生早歲謹

守朱學晚年兼通陸說叙襲朱子舍短集長之論尚
非如近世黨同伐異之為也然考公繼魯齋之後為
國子師朝議以為非朱學正的有沮之者可見當時
持論尤嚴閑道尤謹也噫聖學湮晦毫釐易差諸君
子天稟皆出乎等夷而立論稍涉游移者世猶或譏
之則夫迥然立異鳴高與前賢顯豎幟敵又諸君子
所為戒矣今考元一代諸儒學術大抵宗程朱取舍
之意雖文學政事各有旨歸而要皆原本於道德不

謬師承者矣今錄其著者載于篇乾隆戊辰七月望

後三日書

四明之學黃氏晉嘗言祖陸氏而宗楊泰其言朱子之學者自黃氏震史氏蒙卿始

按寧波府志史蒙卿傳云先淳熙四君子俱接陸氏象山之傳故四明後學皆以陸氏為宗自黃文潔力崇考亭之訓而蒙卿又能遠接其緒以啟迪後進由是朱子之學盛行於四明

教授傳李謨先生定保

傳定保字季謨號古直晉江人宋咸淳中禮部奏賦第
四知貢舉方逢辰見之驚喜曰閱試文意老於文場者
乃英妙若是時相賈似道沮抑新進未令赴廷試定保

歸益力學未幾杭都不守德祐景炎間屢有諷以仕者
皆辭大德初提學吳濤薦授漳州路學正首以太極圖
西銘合而講之聽者悅服改三山書院山長閱三月辭
歸授徒養母初環城冢墓皆發於兵傅氏族最蕃定保
無論親疎悉封之年五十後始得三子母年九十見諸
孫長大至治中以平江路儒學教授致仕其講解能守
先儒成說為文溫潤典裁定保神暢氣怡與物無競未
嘗以非義干人不為矯厲奇絕之行大厯中開奎章閣

聘用儒雅學士虞邵菴集將薦之以老疾不可強起中止著有四書講藁及詩文若干卷

舊郡志參新郡志

監丞陳衆仲先生旅

陳旅字衆仲莆田人父子彥兄震皆一時名士旅幼孤資稟穎異其外大父趙氏學有源委旅得所依於書無所不讀稍長負笈至溫陵從鄉先生傅公定保游聲名日著用薦為閩海儒學官適中丞馬祖常使泉南一見奇之謂旅曰子館閣器也因相勉游京師既至學士虞

邵菴集見所為文慨然曰此所謂我老將休付子斯文者矣即延之館中朝夕相講習自謂得友嘗言曰自衆仲來凡問學修己之事有益於愚陋多矣諸廷臣力薦咸以旅博學多聞宜處師範之選除國子助教滿考諸生為請於朝乞再任元統二年出為江淞儒學副提舉至元四年入為翰林應奉文字至正元年遷國子監丞又二年卒有安雅堂集十三卷虞集為序林泉生稱其學博而通識高而敏使之裁繁理劇有兼人之能處患

制變有濟時之智云

閩書

道南原委

宏簡錄

趙先生必暉

趙必暉宋宗室家泉州與傅公定保為友其文章議論淵懿浩博為閩南碩儒

按泉州舊志趙必暉字伯暉傳末云又有必暉亦宋宗室與傅公定保為友今將必暉錄出附傅公文友之後

州守盧希韓先生琦學派

按先生在元與一時名彥相切劘曾師余氏子賢余稱其經學該貫為人簡重相從十餘年無情容其所

得者深矣先生之經術著作未見藝文志載有圭峰集亦未見余氏子賢疑是三山人俟再考增入

州守盧希韓先生琦

盧琦字希韓惠安人至正二年進士稍遷知永春縣語具郡志宦跡琦在元末與陳旅林以順林泉生皆以文學為閩中名士少受學於余子賢子賢每語其友人三山陳忠曰盧希韓經學該貫為人簡重在吾門十餘年不見其有惰容真畏友也及從子賢試浙省子賢道病

卒琦不顧試期與其友陳彥博經營大事以歸迨得祿視子賢家如師在時載其弟之官與分廩而食琦僅少忠一歲每別去見必納拜曰是吾師行君子稱其厚誼嘗以事赴京中道遽還人問其故琦歎曰中原板蕩矣因太息不已晚以近臣薦除守平陽州命下未至而沒子杲曷洪武中舉人材得官

泉郡志

訓導蔡先生復初

蔡復初福清人舉明經為書院訓導少從龍江林梅所

余大車學易受書又從惠安盧公琦學詩孝友力義琦
卒心喪三年所著有詩銘訓集子仕實見明代科第纂
書閩

陳先生中立

陳中立字誠中莆田人受經於惠安盧公琦以文學著
稱作廟建學以教鄉人祀艾軒晦菴夾祭三先生奉盧
公主配之曰陳經傳為學者剖析宋文憲濂銘其墓曰
維古之世不以位世降俗偷位斯貴貴而無能冠狗彘

豈若夫君賤為庶居家孝友推以義闢廬建學躬訓泣
鄉髦如雲聆且肄少長斷斷類洙泗化器為良暴更懿
醇儒為功斯小試

陳子信諸先生學派

溫陵在元初忠義道德之英遭蒲賊之難漸滅盡矣
然世家舊學抱所蘊而托處山澤者尚有可考自延
祐後科目方行衣冠襲起克自振勵者亦多晦迹於
山長一席溯其秉禮守義之規風流世守出處進退

皆足以光史冊而炳日星今類次諸賢如莊氏圭復之在元諸葛氏晉王氏彙之在明誠確乎其不可拔者矣

貞士陳子信先生士麟

陳士麟字子信南安人性喜學多所周通老宿弗逮每取諸葛武侯吾心如秤不能為人輕重之言以自儆所居在縣之烏石山種稻盈郊樹桑環宅市書課兒釀酒延客或適意漁獵放浪數澤間病革囑其子同曰平生

慕古今且不起喪事依禮慎毋用二氏非親知不受弔
踰月而葬題云有元貞士烏石陳公之墓

閩書

訓導莊元振先生震孫

莊震孫字元振晉江人莊夏之元孫元末薦授郡訓導
清源文錄

徵士莊容齋先生圭復

莊圭復字生道號容齋思齊之子晉江青陽人篤志勵
行以文學名少從遊於丘葵值宋季流亂手未嘗釋卷

誠信孝友建祠宇立祭田宋亡隱於青陽吟咏自如至
順間福建閩海道知事清江范梈以主學行聞於朝詔
書屢下終不起年九十一卒於家

何鏡山撰莊氏族譜
序新志節張廷芳

撰墓志

蒲先生仲昭

蒲仲昭晉江人祖心泉故梅州守察宋國危遂隱身讀
書遺詩若干卷劉克莊序之丘鈞磯有輓心泉蒲處士
詩仲昭既世其業而游居于泉以詩鳴者陳衆仲阮信

道王元翰仲昭或師或友皆兼所長

叅政王先生彙

王彙邵陽人曾祖元為元翰林學士卒贈潞公彙登至
正庚辰進士歷貴州行省叅政順帝時言天下羣盜蜂
起直諫內廷之非權臣阿實克布哈譖以忤旨取譴入泉
與學士稍講經義朝野交薦固辭不往遂家於泉中

閩書

檢校諸葛仲昭先生晉

諸葛晉字仲昭晉江人以明經授福建行省檢校兵興

省檄分治尤溪縣鋤艾豪強有廉能稱境賴保障邑有
朱子毓秀舊址後為書院年久沒入豪家晉訪復之既
成書院池中產瑞蓮二芝草五明興徵聘不仕坐以前
代故官謫徙潁上遂卒於潁年七十六子瑤杜門養志
娛心經史

學正許豹山先生汝翊

許汝翊號豹山晉江人大德十一年鄉舉經術湛深文
學該貫授本州學正士服其教年八十致仕所著有孝

經析義訓辭全書

泉郡新志文苑

清漳諸先生學派

按清漳為閩山川之極南清淑之氣鍾焉自朱子過
化之後王東湖陳北溪親承旨授講習而不振之始
焉崇尚佛老即變為禮樂之區故朱子有五百年逃
墨歸儒之語也元代明卿諸賢一時斌斌儒林之選
其隱身岩穴或以薦舉而膺師儒之任者比比矣茲
擇其著者載於篇

經歷林明卿先生廣發

林廣發字明卿龍溪人別號三溪嘗謂陳安卿號北溪
高彥先號東溪蔡汝作號南溪而已號三溪將兼而匹
焉生平孝友規言矩行通貫六籍融會百氏郡學三聘
為諸生師以部使薦授安溪學職邑僚師事之會寇作
奉府檄招降授以縣主簿仍謀軍府事每俘至委訊輒
曰此平民也府帥問曷辨曰獲於巢穴者為賊捕於井
里者為民此皆自井里得之自是俘至多免死陞福建

屯田萬戶府經歷所著有三溪集傳世子唐臣見明代

後改民弼

閩書

通志

學正王先生吉才

王吉才龍溪人篤志古道尤明典禮郡守延為弟子師
後為泉州學正吉才親終皆及期耄而已老矣哀慕痛
毀有如早喪雖在家庭亦冠衣斂容人未嘗見其遽言
怒色學者稱為益齋先生

閩書

學正黃君翊先生元淵

黃元淵字君翊龍溪人父進本縣學諭元淵至正中薦
知漳州路學錄秩滿陞泉州路學正卒郡有朱文公祠
宋守方未所建至元其地為寺元淵自出私錢買城東
北隅地別建之作大成殿以祀先聖先賢作祀堂祀文
公以黃幹陳淳配別作講堂齋舍處師弟子天歷四年
告成至順三年國子助教陳旅告學士虞集曰捐家業
以為浮屠老子之宮求福利益者世不勝數元淵觀鄉
邦之寥寂慨斯文之泯墜節衣食之資以成義舉書院

成而家已貧矣君子其有取於斯乎公其為之記 閩書

文學周于一先生祐

周祐字于一龍溪人能古文詞有僉事左姓者督師漳南祐作邊臣近鑑以獻左曰史才也薦為同安文學進其書于朝以備國史編錄至正七年與門人林弼同舉省闈祐第一

楊宗璉先生稷

楊稷字宗璉長泰人資性高雅好古慕學隱遯不仕至

正間邑庠缺官令林幹爾聘攝學事振文風變習尚以義理行誼為教士習一新所著有田家樂歌傳于世

歌曰

田家樂田家樂樂在堯天事耕鑿大兒北墮種白雲小兒南澗飲黃犢婦姑辛苦課蠶桑深夜寒機響茅屋衣食餘饒稅早輸吏不到門犬睡足有時客至問起居黍雞肥新釀熟三杯酒後更高歌盡是田家太平曲

延平曹伯大諸先生學派

元代科目至仁宗延祐間始酌舊制行之諸賢或以科第顯或以隱佚終砥行立名皆有足稱溯之羅李前徽淵源尤可接云茲錄其概著于篇

判官曹伯大先生道振

曹道振字伯大沙縣人進士第除福州路判官博學通經至正間嘗編次羅仲素文集為十八卷

延平府志

處士郭先生居敬

郭居敬尤溪人博學事親歡順親沒哀毀盡禮嘗撫虞舜而下二十四人孝行之概序而繫之以詩用訓童蒙時虞集歐陽元欲薦于朝居敬牢讓不起終身隱于小村以處士卒

判官張在中先生本

張本字在中將樂人元統元年會試以蒲輪賦得高選

登進士第官至寧都州判官延平府志

虞先生真翁

虞真翁尤溪人至正間隱南溪山樂道自守不求聞達
客非其類不與接遇知書者相對竟日叅訂所疑縣尹
許惟敬深加禮重

邑志

閩中理學淵源考卷三十六

欽定四庫全書

史部

閩中理學淵源考卷三十七至四十四

詳校官編修_臣謝振定

刑部郎中_臣許兆椿覆勘

總校官原任中允_臣王燕緒

校對官中書_臣田尹衡

謄錄監生_臣鍾浩

欽定四庫全書

閩中理學淵源考卷三十七

廣平府知府李清馥撰

建寧熊勿軒先生未學派

按勿軒熊氏禾史載從浙東輔漢卿先生學石堂陳氏普又從輔氏門人浙東韓維則學輔氏則又朱門高弟也

熊氏師於輔氏年歲按之可疑另有辨附後

熊陳二公為有元一

代大儒閩海憲使許公序熊集有立綱常關世教紹

統緒之稱

此許公疑為魯齋公之後辨見下

史稱陳氏尊聞紹言屹

然為朱門嫡派其出處高風與劉靜修文文山謝疊

山胡庭芳同出一轍也閩中元代之學二公為首倡

之再熊公勿軒諸前哲叙述多繫之宋考邵氏續宏

簡錄補列在元儒蓋諸老彫謝而先生如存碩果且

一代風教必有一二師表為典型倡率雖宋之遺民

而實元之文獻也故特表而出之至丘氏富國亦從

學輔氏同為宋世之遺民云再余輯閩中元代學派

惟熊陳丘氏得輔氏之學以行其緒今續考熊公自述受業浙中劉敬堂考劉敬堂即金仁山先生是熊公亦承金華三子之傳也莆中林氏以辨父子亦皆遞承瓜山潘氏復齋陳氏派別朱門一綫之傳賴以不墜又泉南有傳定保盧琦數公一時師席外此寥落無聞何耶蓋剛正直方之氣折於偽學黨錮之餘而秉道抱德之徒所以長往山林韜光晦匿即有授徒講藝亦荒略姓氏而不著豈當時操簡敘述者多

缺而不書乎抑學術升降盛衰之候有絕有續固有
時耶嗟乎公生季祚去文公之時百有餘歲矣老成
彫謝典型獨守鼎革後抱道空山脩明六經毅然以
斯文自任至今仰洪源書堂歸然與滄洲雲谷蔚峙
而長存也公平生著作悉稟文公家法於易詩書春秋
小學四書皆有集義又有三禮通解其撰三山五
賢祠記確尊五先生位置諸賢而進退之持論堅卓
不涉游移尤見閑道之謹又論

孔庭祀典至今多行其說其撰文公書院記致詳於全體大用之學而推求晚年充養於大本大原之地追溯延平李氏喜怒哀樂未發前體驗真切功夫而終之以敬貫動靜之旨以為聖人復起不易斯言嗚呼先生敘述文公之學即先生精詣造道之學也公師承確有淵源數十年不求聞達其扶世立教繼往表微之功遠矣嘗讀公送胡庭芳序言曩遊浙中因受業於敬堂劉先生得聞文公晚年所以與勉齋黃

先生潛室陳先生論學之旨然後乃知文公之學與世之所言者不同也觀此則公於劉公授受之際淵源卓矣劉公已詳考本末另記附後再按公雅志紹先不在魯齋草廬白雲諸公下今許吳白雲已從祀廟庭竊揜遺史如公與胡公一桂胡公炳文陳公櫟熊公朋來呂公大圭丘公葵出處皆有本末其纂述有關於名教補苴有功於經學似皆祀典不可缺之人尚有待於表章之後賢云

熊勿軒先生禾

熊禾字去非號勿軒又號退齋建陽人雨錢公十六世孫世居鰲峰之陽總角能文志瀟洛關閩之學訪朱子門人輔氏而從遊焉登宋度宗咸淳十年進士授寧武州司戶參軍宋亡不仕束書入山築洪源書堂從學者數百一時多士若胡庭芳劉省軒詹君履皆從之遊日以周孔之說相磨礪於朱子諸書是信是行後歸故山復創鰲峰書堂以周程朱張五賢為道統正派祀之以

配先師而邵馬不與焉初謝疊山聞先生名自江右來訪及會共訴宋亡之痛抱持而哭因相與講論夫子之道而胡公庭芳素明易學自江西挾道相訪相講切者十有七年嘗謂秦漢以下天下所以無善治者儒者無正學也儒者所以無正學者六經無全書也考亭朱子集正學大成生平精力在易四書詩僅完藁書開端未及竟雖九峰蔡氏猶未大暢厥旨三禮雖有通解缺而未補尚多至勉齋黃氏信齋楊氏粗完喪祭二書而授

受損益精意竟無能續若春秋則不過發其大義而已
豈無所俟於來學乎兵難之餘學徒解散文集燬亡早
歲成春秋通解一書又厄于火兼以齒髮向衰易詩書
僅得就緒春秋更加重纂則皇帝王霸之道亦或粗備
惟三禮乃文公與門人三世未了之書且周官六典原
不缺當復其舊而儀禮十七篇且欲各附禮記傳義以
為之兆庭芳當分任此責以畢吾志其後竟修儀禮未
及成書卒福寧陳益方足而成之以為禮編嘗取朱子

諸書擇其至精且要者為一編名曰文公要語而以邵氏張呂及朱氏門人之說為附錄又為小學集疏大學尚書口義凡三十卷今行于世者有春秋通解大學廣義易講義書說四書標題三禮考異經序學解先生嘗脩考亭書院而為之記及後有求考亭書院記於草廬吳公者因聞先生所作則以手加額曰江南有人矣予奚置喙其論孔廟祀典後世多行其言云

閩書源委

道南歷代

名儒傳

續宏簡錄

家傳

行狀

熊勿軒先生文

考亭書院記曰周東遷而夫子出宋南渡而文公生世
運升降之會天必擬大聖大賢以當之者三綱五常之
道所寄也道有統義軒邈矣陶唐氏迄今六十二甲辰
孟氏歷叙道統之傳為帝為王者千五百餘歲則堯舜
禹之於冀也湯尹之於伊亳也文武周公之於岐豐也
自是以下為霸為強者二千餘歲而所寄僅若此儒者
幾無以藉口於來世嗚呼微夫子六經則五帝三王之

道不傳微文公四書則夫子之道不著人心無所以主利欲持世庸有極乎七篇之終所以近聖人之居而尚論其世其獨無所感乎嗚呼由文公以來又百餘歲矣建考亭視魯闕里初名竹林精舍後更滄州宋理宗表章公學以公從祀廟庭始錫書院額諸生世守其學重惟文公之學聖人全體大用之學也本之身心則為德行措之國家天下則為事業其體則有健順仁義中正之性其用則有治教農禮兵刑之具其文則有小學大

學語孟中庸易詩書春秋三禮孝經圖書西銘傳義及
通鑑綱目近思錄等書學者學此而已今但知誦習公
之文而體用之學曾莫之究其得謂之善學乎矧曰體
其全而用其大者乎公之在考亭也門人蔡氏淵嘗言
其晚年閒居於大本大原之地充養敦厚人有不得窺
其際者蓋其喜怒哀樂之未發蚤聞師說於延平李先
生體驗已熟雖其語學者非止一端而敬貫動靜之旨
聖人復起不易斯言矣嗚呼此古人授受心法也世之

弱口耳之學何足以窺其微哉公之修三禮自家鄉至
邦國王朝大綱小紀詳法畧則悉以屬之門人黃氏幹
且曰如用之固當盡天地之變酌古今之宜而又通乎
南北風氣損文就質以求其中可也使公之志克遂有
王者作必來取法矣嗚呼古人為治之大經大法平居
既無素習一旦臨事惟小功近利是視生民亦何日蒙
至治之澤乎秦人絕學之後六經無完書若井田若學
校凡古人經理人道之具盡廢漢猶近古其大機已失

之矣當今治宇一統京師首善之地立胄學興文教文
公四書方為世大用此又非世運方升之一機乎邵氏
觀化所謂善變之則帝王之道可興者以時考之可矣
誠能於此推原義軒以來之統大明夫子祖述憲章之
志上自辟雍下逮庠序祀典教法一惟我文公之訓是
式古人全體大用之學復行于天下其不自茲始乎今
公祠以文肅黃氏幹配舊典也從以文節蔡氏元定文
簡劉氏燾文忠真氏德秀建安武夷例也我文公體用

之學黃氏其庶幾乎餘皆守公之道不貳其侑公也甚
宜公以建炎庚戌生於劍之南溪父吏部韋齋先生之
仕國也公蘊經世大業屬權奸相繼用事鬱鬱不得展
道學為世大禁公與門人益務堅苦泊如也慶元庚申
歿於考亭後十年庚午疆場事起又六十七年丙子宋
亡公之曾孫浚以死節著嗚呼大聖大賢之生其有關
於天地之化盛衰之運者豈可以淺言哉夫子之六經
不得行於再世而公之四書乃得彰於當代公之身雖

詘於當時而公之道卒信於其後者天也過江來中州
文獻欲盡自左丞覃懷許公衡倡明公學家誦其書人
尊其道凡所以啟沃君心栽培相業以開治平之原者
皆公餘澤也

三山郡泮五賢祠記曰僕於雲谷之陽鰲峯之下狃小
精舍中為夫子燕居配以顏曾思孟次以周程張朱或
曰文公竹林精舍以六君子從祀先朝取其法行之太
學達於郡縣今邵馬二賢不與無乃非文公初意邪曰

從祀之典凡先儒之有功德於聖門者咸在若夫配食先聖非其道德功言足以得夫聖統之正傳者不足以與此也此五先生吾無間然者矣若夫邵馬張呂諸賢固已秩在從祀矣非去之也文公贊六君子乃一時景行先哲之盛心而竹林之祠增延平先生為七賢又以致其平生尊敬師傳之意是固各有攸當非可以此為疑也歲在癸卯之夏三山郡泮議剏新詞郡博士東武劉叔敬諗予曰泮舊有道立堂按舊碑蓋取師道立善

人多之義自濂溪而下凡十有五人首六君子次廣平
游氏龜山楊氏豫章羅氏延平李氏次晦庵朱氏南軒
張氏東萊呂氏西山蔡氏勉齋黃氏丙子兵戈之後司
文臺典教職者又益以北山陳氏信齋楊氏毅齋鄭氏
說齋楊氏庸齋趙氏凡五人皆學於文公亦所以昭是
邦文物之懿也但考之郡志西山真氏帥三山時嘗躬
尊道閣祀文公但以勉齋配道立堂舊祠亦止於勉齋
今廉臺之長恪齋嚴公更創新祠欲復尊道之舊而議

者言人人殊子其有以教之僕曰是祠若仍道立之名則為隆師道而設姑仍其舊可也但師弟子不應皆北坐南向勉齋以下北山信齋諸賢皆北面受經於文公者乃侈然並居南面之列此則有不可不正者若更尊道之名則為隆道統而設其祠固當止於五先生他有不得而與焉邵馬張呂諸賢自有從祀典廣平龜山豫章延平西山諸賢則建劍鄰郡各有專祠稽之禮經國無先師則合於鄰國勉齋為朱門道統單傳又不但

三山一邦之望莫若正西向脩食之位雖不合於鄰國
可也西山尊道初意亦正如此時盱江德臣李君亦曰
饒之石洞亦以夫子居中配以顏曾思孟周程張朱五
賢勉齋繼之時曲阜孔君申卿實主其議遂白之嚴公
首以為允於是繪像立祠更扁尊道又以僕嘗與聞斯
義且屬為記適莆陽史侯有刊脩禮書之約遂不得竟
其事繼會莆陽博士永嘉朱蜀翁議創先賢祠亦以下
問僕援此答之皆以為允但有以程張坐次為疑者蓋

橫渠於二程為表叔端平從祀之典張先於程竹林七賢之祠與六君子之贊則程先於張二者不同議卒靡定僕曰橫渠之學得於二程皐比之撤與夫平居議論歷歷可考聞道在先固有所受也但當以竹林之祠為正此乃學校之公不得與家庭之私例論矣於是莆之新祠位置遂定會孔君以三山士反之請屬記於史侯深言尊道之祠止於五賢不及邵馬者乃萬世道統所係惟當以此為定孔君又言曲阜舊有五賢祠乃祀荀

楊諸賢今祠已燬歸當請之行聖公更議以此五賢易之此不惟大明洙泗之正傳亦以一洗漢唐之陋習扶世立教抑邪崇正之功宏矣因其行也力贊勉之私竊自謂山中一時綿蕝之禮或者因莆福二郡以為之兆亦區區之志也忽三山朋友以書來詰謂舊祠邵馬以下凡十有四人皆從改撤公議之戈莫不倒指於首議之人子當何以解之且賢牧鄉賢二祠亦聞有所建白若其果然慎勿復言可也余蓋深歎世衰道微之餘學

校無公論迺至於此自可忘辨然斯道所關則亦不可以不直者輒申其義或者倘有察焉亦學校風化之一助也

敬齋銘箴跋曰按南軒張子敬齋銘專以敬為宅心之要蓋心存則衆理具而萬事之綱舉矣非心存之外別有所謂敬也朱子之箴不過發其未盡之蘊程子曰制於外所以養其中吾未見外貌之肆而中心之存者故所貴乎動靜弗違表裏交正也後之學者見箴不見銘

但有矜持拘迫而無從容涵養之功甚者以擎跽曲拳
為敬看得敬字多死而不活嗟夫聖賢之學不講人心
失其所為主理乖事謬世道隨之豈小故哉南軒集中
敬齋記有曰萬事具萬理萬理在萬事而其妙著於人
心一物不體則一理息一理息則一事廢敬者貫萬事
統萬理而為萬物之主宰者也致知所以明是心也敬
者所以存是心而勿失也又曰心生生不窮者道也敬
則生矣生則惡可已也怠焉則放放則死矣此千古聖

賢傳授心法之妙學者深體而屢省之哉

送胡庭芳序曰宋南渡初武夷文定胡公造行都有以程氏之學盛行為言者公輒愀然曰吾方以程氏之學不行為懼何謂盛行耶豈誦習其說者皆可以言程氏之學耶余讀書武夷山中有胡君庭芳自新安攜一編書來訪究其業蓋自朱氏而尤粹於易留山中三閱月相與考訂推象數之源極義理之歸書成余已為繫語其後矣又復相與推究文公所論他經大旨重惟詩書

二經訓義已具獨三禮通解猶未完書而春秋則僅發其旨要白鹿臨漳所刊尚有望於後之人余知非其任而竊有志焉春秋一經蓋竭精力者九年而稿本燼於丙子之厄俯仰十載學植荒落余交遊多矣論經說理鮮有如君者何幸得因切磋究之相與纂述以成一家言胡君曰諾歸將考隸一經焉明年春當賁糧武夷山中以畢斯業臨行且求一言為別余深有感於文定胡公之言而告之曰前所云亦誦習其言而已文公歿且

百年門人傳習寢益失真余以為文公之學不行文公之道不傳也曩遊浙中嘗因受業於敬堂劉先生得聞文公晚年所以與勉齋黃先生潛室陳先生論學之要旨然後乃知文公之學其體全體其用大用與世之所言第以資誦說者固不同也蓋必有以出乎其外者乎因我同志輒發其端君之學源於盤礪董先生江東文獻風流猶有足證其以予言參之殆有合乎否耶且以告江東士君子之學自朱氏者

識熊勿軒先生傳後

嘗聞之治經者必守家法講學者必歸踐行要其派別
必本於師傅友授此古人博習親師論學取友其淵源
不可誣也余自壬戌歸里後蒐輯閩中師友累年考訂
墜緒莫尋竊念海濱載籍荒落殘闕湮沒者多矣况欲
網羅列代尚友千載搜討於離索之餘抑又難已因得
之名家著作可補一二者如宋初莆陽蔡君謨執經於
三山周公闢邵武黃簡肅中早薰炙於舅氏游定夫先

生晉江梁文靖克家實為永春陳休齊知柔門人溫陵
劉叔文為朱子之高弟晉江梁壽卿椿選設教於安溪
來蘇建立書院實友於呂時可中洪陽巖天錫諸公俱
於師友考中詳之矣獨建陽熊氏勿軒先生未見確然
可據者今讀先生行狀載友於胡一桂庭芳其本傳載
訪文公之門人輔氏而從焉行狀為建寧府訓導天台
李讓撰本傳書前翰林僕處約述二篇未詳所作年月
先後獨傳中詳載公生於宋理宗淳祐七年丁未卒於

元仁宗皇慶元年十月葬於鰲峯之橫瀝今讀熊公文
集師於輔氏未見叙述一語惟送胡氏庭芳序有曰曩
遊浙中嘗因受業於敬堂劉先生得聞文公晚年所以
與勉齋黃先生潛室陳先生論學之要旨然後乃知文
公之學其體全體其用大用與世之所言第以資誦說
者固不同也因我同志輒發其端又云吾子之學源於
盤礪董先生江東文獻風流猶有足證其以余言參之
殆有合乎按此則公之受業於敬堂者所得必深而發

端於同志欲兩證其所學此其師承根柢有在矣而傳言輔氏者絕無及焉累年蓄疑莫釋自戊辰七月輯公傳藁無從考證逮乾隆壬午往浙歸途於蘭邑書坊中購得金氏履祥先生文集鈔本共三卷卷一首帙書後學喻良能香山校下列刊刻門人十人首曰熊銖熊瑞林景熙方逢辰汪夢斗陳淳鄧虎張侶許棐羅願捧讀再四竊疑熊公師於仁山本集中全無叙及其疑與師輔氏同且陳氏淳疑閩中北溪名氏已是勉齋一輩人

年歲已久不應在弟子之列歸里來忽忽六載於今歲
閏七月間雨窗重閱仁山先生本傳及張氏祖年金華
正學編乃知金公本姓劉因避錢武肅王嫌故以金易
劉遂恍然公所述聞之於師者恐即金公也且又述勉
齋潛室二公所以發明文公晚年所造元元本本自非
金華的傳其能如此斷制耶其曰敬堂者考金公字吉
甫晚歲卜築仁山因以為號又號次農所謂敬堂未有
顯證然考魯齋王氏栢受學於北山何氏基時北山授

以立志居敬之旨遂著敬齋箴畫出一敬字為日用躬行之則及讀金仁山祭北山文定公文曰甲寅季秋時始受學截斷為人一語夢覺謂古聖賢一敬畏心曾子終身臨淵履水然所謂敬匪拘匪懾常以為重則固或越又祭魯齋王文憲公文曰卒於北山師資就正有的其傳立志居敬讀此知公於何王二公反覆授受於敬之一言實溯洛閩心法與程門尹公以敬為入門之要者一脈實相脗合縱未得敬堂為仁山稱號確證然彼

時任重詣極恪佩師訓用力於敬者非異人任矣再按
熊公送胡氏序作於宋端宗景炎丙子後十年適當元
世祖至元乙酉之歲蓋世祖一統至此已六年矣公宋
代遺民避榜名未定書鉢字或稱其師舍改姓而從舊
姓抑亦寓勝國君臣之義云爾或尚有敬堂其人亦未
可知惜金華諸名集無從搜訪尚俟博考者訂正之再
考輔氏漢卿雖朱子晚歲所得門徒然考漢卿本傳初
事呂東萊後卒業於晦翁即朱子語錄亦云向在臨安

相聚見伯恭門徒無及之者伯恭於淳熙八年卒先朱子卒二十年則輔氏從學於朱子之門年亦非壯矣及考魏氏鶴山跋朱文公所與輔漢卿帖云先友漢卿端方而沉碩文公深所許與往來書帖當不止此云云此則漢卿身後鶴山所述之語也鶴山卒於嘉熙元年後十一年勿軒方生則僕氏叙勿軒訪文公之門人輔氏而從遊一語似無可據矣僕氏叙述於勿軒音容未遠之初而余謬訂於勿軒已往四百五十餘年之後是檢

前人之愆不禁爽然失矣嗟乎師友道遠末世託名標榜互相依傍者多然在昔高自位置恥學於師者亦有之昔河汾門人多有顯達迨修隋史而遺其師不立傳以致千載若明若昧是師友所係匪淺矣今考仁山之集校者喻氏良能著忠義傳二十卷文集數十卷兄弟皆宋季遺民一時名德則校訂繫名豈苟哉至刊刻數公姓氏亦皆表表千載可以傳信者也夫金公當日之文固不藉數公而顯而數公亦非藉金公之文以傳也

予固感金熊二公傳習本末皆關彼時斯道絕續之交
碩果之會也故不禁娓娓具述焉乾隆丁亥閏七月望
後一日丁未清馥謹識

教授李士則先生文

李文字士則崇安人聰敏篤學遊熊勿軒之門與杜本
友善談議間一以講學為事聲聞四馳學者羣然取正
皇慶初舉為蘓州學教授

教授虞善繼先生光祖

虞光祖字善繼崇安人幼受學於熊勿軒博綜經史為
文有跌宕氣官邵武學教授

安子仁先生實

安實字子仁崇安人哀長吉曾孫也以哀為嫌遂易今
姓師事熊勿軒聚徒講學其憂憤鬱懣之氣往往發之
文章及卒建安翁植誅之曰子仁氣激乎鯨海學傳於
鰲峯絕塵險詞拔神牙而破鬼膽鉤元幽思出月脇而
穿天心

迪教郎江繼祖先生志

江志字繼祖事熊勿軒私淑文公刻意精詣士從遊者隨材質高下皆有所得延祐中歲大侵至殺人相食志毀家賑恤邑令夾谷山壽列薦省劄授迪教郎

陳先生蒙正

陳蒙正未詳其鄉里考陳公送熊先生東歸序有曰癸卯之冬退齋熊先生至某往就學焉亦受業其門者又曰書之可通足跡之可至疑是閩邦之士也俟再考

學正詹先生君履

詹君履邵武人按熊先生送詹君履學正序畧云記甲

申歲

世祖某年

余始卜居武夷之南邑里秀俊相與遊從者

固不乏人而穎異成材者指亦未易多屈當路崇植儒官獎引士類惟儒官一途為捷徑於是年盛力強欲藉以奮身者胥出焉隱屏之下曲溪之濱歲歲作贈語餞友朋散出郡邑蓋不少矣樵居閩上遊徃徃拔其尤一人為之正曰劉某今年拔其尤一人為之錄曰詹君履

皆武夷舊游也君履行有日同舍各致贈言之義余將
何以告子則謂之曰當路遴選儒官一途非但可資以
進身也涵養德器脩礪學業正在此時云

全文詳著述
後不具錄

劉希泌先生應李

以下交友

劉應李字希泌初名榮韜仲孫謹厚莊重博習脩潔舉
咸淳十年進士調建陽簿宋亡不仕與熊勿軒胡廷芳
講道洪源山居十有二年後建化龍書院與莒潭聚徒
講授厚給課試悉倣州縣法

林先生若存 陳子芳

林若存福清人陳子芳寧德人按熊先生祀典議畧曰
遵道之祠只及周程張朱五先生而不及司馬邵氏嘗
以此求正於鄉先生福清林若存謂此論直可質無疑
而俟不惑且謂康節作長歷書建成元吉作亂秦王世
民誅之可與溫公作通鑑書諸葛入寇同科此亦一証
寧德陳子芳謂此說已是程子亦曰堯夫直是不恭又
曰堯夫根本不帖帖地其不滿溫公處亦多更以此參

之當益明矣觀此則林陳二公皆當時耆德與勿軒先生相切磨者本傳未得俟再考增入

魏先生夢斗

魏夢斗見熊先生考亭書院記與公分教大小學者未詳籍貫俟詳考增入

劉先生邊

劉邊建安人與熊勿軒友善工詩文所著有讀史撫言行世

閩中理學淵源考卷三十七

欽定四庫全書

閩中理學淵源考卷三十八

廣平府知府李清馥撰

丘行可先生富國學派

按先生登宋淳祐七年進士後文公數十年黃氏海
辨正之謂道南源委作朱子門人為非蓋亦從公之
門人輔氏學耳今從黃氏本

丘行可先生富國

丘富國字行可建安人受學朱子之門人輔氏漢卿淳祐七年進士為端陽僉判宋亡不仕著周易輯解十卷經世補遺三卷易學說約五篇發明朱氏宗旨

閩書

鄭翠屏先生儀孫

鄭儀孫號翠屏建安人從邱氏富國學易咸淳癸酉應賢良舉又明年少帝北行儀孫退而著書易圖說解大學中庸章句史學蒙求箋註性理字訓郡守吳某率幕屬迎于學師事之

閩書

知事張伯陽先生復

張復字伯陽建安人泰定元年進士仕建寧路知事師事鄭儀孫學易得邱氏之傳嘗輯諸儒論議編性理遺書

閩書

應奉張子京先生諒

弟貢

張諒字子京建安人與弟貢學易於丘富國著經史事

類并書澤三十卷後賜秩翰林應奉文字

閩書

建安雷氏家世學派

按雷氏龍濟先生以殉國難其子志澤先生以遠於
易傳之後嗣皆以易名家彥舟先生後亦以殉節著
平昔尤以朱程為學的立論先德行而後文藝其倡
建義士莊以濟士類信乎一命之士存心愛物必有
所濟其貽謀保艾者遠矣

教授雷志澤先生德潤

雷德潤字志澤一名逢辰建安人父龍濟宋鄉貢進士
以殉國難德潤學遠于易旁通諸子及律歷術數舉明

經除福州路教授積學庾之餘買田三百餘畝以給貧士婚喪老疾者號義士莊人為建祠學宮調長樂簿卒德潤為學先德行而後文藝講論必以朱程為主教人必以聖賢為法子機拱杭

閩書

待制雷子樞先生機

雷機字子樞延祐進士授古田丞遷延平總管府知事改邵武經歷邵長官有怙勢撓政者機每命吏抱案牘與庭辨不為屈郡政以平調興化尹察知邑中賦役不

均機令民首實而品第之日更一吏主牘賦以大均民
呼為雷神丁內艱服闋轉湖廣儒學副提舉月書季考
具有成法擢延平總管府推官順昌尤溪沙溪南平數
縣疑獄株連累歲悉得解釋建義學延鄉貢進士陳竑
願教之俄羅天麟反汀界上立堡柵集丁壯盜不敢犯
陞惠安尹究心學政以興禮讓之俗三歲最諸邑代還
民立祠樹碑鄉井幾遍除汀州總管府推官築城開濠
以實堡障申屠嗣僉事閩部行郡至汀稔知機賢悉委

訟牒已不俟引年遽上休致朝廷嘉其廉退陞翰林院
待制階朝散大夫機軀幹魁梧方面美髯居官尤盡心
獄事夜參半孤燈熒熒繙閱成案不休曰人命至重為
人嚴而不苛和不流所著文辭森嚴演迤有龍津龍
山鄞川環中黃鶴磯梅易齋碧玉環七稿子燧燦

閩書

縣尉雷君實先生拱

雷拱字君實興化縣尉以公廉正直稱壬辰歲因羅天
鱗亂委守海口卒于官亦通於易

州守雷彥舟先生杭

雷杭字彥舟建安人與兄機拱俱以易鳴於時嘗著周易註解行世時稱雷氏易舉浙江鄉試第一登癸酉進士授浙江儒學提舉遷武平縣尹調潮陽以死事贈奉化州知州官其子煜為同知

閩書

通志

魏菊莊諸先生學派

元代建安之派去游胡劉朱之遺未遠也其流風餘槩猶有傳人然考其時多潛身草澤或託儒官一途

以自奮而志業弗究其用者多矣今搜錄數十家次其懿行或承之家學或得之私淑或以文學知名或以附聲大雅原委所漸尚有可稽云

魏荊莊先生慶之

魏慶之字醇甫建陽人師於王晟得考亭學中歲留情詩賦種荊盈籬詠觴自適號荊莊翁手編詩人玉屑若干卷而尤以施捨稱

閩書

學正游子善先生應翔

游應翔字子善崇安人酢七世孫也值宋元兵革未靖
結屋武夷澄川之上耕隱自晦人稱其操履端方無愧
先世後繇武夷直學遷學正

山長陳良材先生楠老

陳楠老字良材政和人至元元年以鄉貢進士授興化
路涵江書院山長轉建陽雲莊書院山長至正間棄官
歸嘗過萬竹菴題詩曰青山迥望合萬竹淨娟娟寶殿
晴光冷瑤階翠色妍龍吟明月夜鶴舞秋天坐聽涼

風發軒櫺響澗泉

建寧府志文苑

江荊隱先生應隆

江應隆自號荊隱建安人求學於謝疊山疊山字之曰仲龍蓋取孔明長嘯隆中而時人以伏龍待之

周先生震一

周震一建安人家在城府不妄交一人謝疊山枋得客建寧震一獨與相厚疊山稱其忠厚篤敬言不妄發行不妄動翛然出塵埃之外而可與神遊八極之表子持

敬亦修真慕道為謝疊山所稱

山長朱泳道先生沂

朱沂字泳道建陽人文公三世孫累薦遺逸不赴與謝枋得游枋得稱其論古今人物高下國家興廢善類仕止久速之故掃盡華葉獨存根株文公之後濟其美者泳道一人耳晚歲授考亭書院山長

趙順之先生若

趙若字順之崇安人號澗邊蒙古岱丞相入閩一見重

之薦授同安縣尹不就隱於家有園池亭榭之勝以供
嘯咏高丞相開閩省三使人來聘之強為一見勸之仕
不從長于詩年六十四終有澗邊集二十卷

蘇明遠先生照

蘇照字明遠建安人工詩文尚儒術後進多師之至正
間以明經薦至京預纂修事欲授以官以親老辭卒年
八十子伯厚見選舉

推官楊仲宏先生載

楊載字仲宏浦城人徙家洪州少孤博極羣書年四十
不仕以賈國英薦召為國史院編修官與修武宗實錄
延祐初舉進士歷寧國路推官卒載為文有跌宕氣博而
敏直而不肆自成一家言而於詩尤有體嘗語學者曰
詩當取裁於漢魏而音節則以唐為宗自其詩出一洗
宋季之陋與虞集范梈揭傒斯齊名時號虞楊范揭有
詩集行于世

建寧府志

彭元亮先生炳

彭炳字元亮詩倣陶柳游齊秦都下聞昌平隱者何得
之遂往謁之駙馬烏克遜事以師禮朝野自是知名至
正中徵為端本堂說書不就有集一卷

閩書

教授鄒文祥先生天瑞

鄒天瑞字文祥建安人任建寧路教授元季風化凌夷
天瑞首唱文學諄諄以忠孝廉節開士士為振起

閩書

司訓鄒季和先生文慧

鄒文慧字季和建寧人任司訓元末謝職服柴桑巾服

講明朱學本郡理學推文慧為首

郡志

張先生以仁

張以仁政和人元季隱築蓮花峯下與魏伯堅謝坤孫
蘊余應相友善旦夜講論經史至忘饑渴後俱以文行
知名而以仁伯堅終隱不仕卒

郡志

閩中理學淵源考卷三十八

欽定四庫全書

閩中理學淵源考卷三十九

廣平府知府李清馥撰

邵武黃存齋諸先生學派

邵武諸賢學派源委卓乎可述而以經學詩學專門名家者尤可尚已黃氏鎮成之篤志聖學陳氏士元之隱節黃氏清老之通經李氏應龍之師表李氏學遜之易學黃氏元實之凝重嗜學致命遂志黃氏大

昌父子之隱德危氏德華之不慕榮達嚴氏儀卿之精深詩學皆表表為世羽儀茲特錄其著者列之篇端

貞文黃存齋先生鎮成

黃鎮成字元鎮邵武人年弱冠即厭棄榮利慨然以聖賢道學自勵號存齋學者稱存齋先生延祐間科目行再試有司不合遂築室城南名南田畊舍作詩寫懷曰白日不停馭頽波竟東馳忽忽年歲改念此將安歸我

欲驅車行太行路嶮巖我欲駕方舟滄海無津涯豈不
顧行邁出門慎所之有田南山下可以供盛筵中廬在
中田可以談詩書上探羲皇際下及商周時聖賢尚淪
落微生亦何疑懷哉羨門子千載以為期部使者聞其
賢相繼論薦不應後以執政薦授江西路儒學提舉命
下而卒集賢定謚曰貞文處士所著有尚書通考周易
通義中庸章句性理發蒙秋聲集

閩書錄

通志

宏簡

著述

先生尚書通考叙曰書載二帝三王之政政者心與事之所形也是故道德仁聖統乎心制作名物達於事内外之道合而帝王之政備矣然統乎心者先後古今昭合無二達於事者儀章器物因革無存故求帝王之心易而考帝王之事難矧後儒稽古不過以周為據而秦人滅學周典亦多殘缺廼欲以不完之文上徵隆古之舊斯益難矣昔紫陽之教每語學者謂如堯舜典歷象日月星辰律度量衡五禮六樂禹貢山川洪範九疇之

類須一一理會令透蓋讀書窮理即器會道乃學者之
當務也余方授兒輩以書間或有問不容立答則取關
涉考究者會萃抄撮或不可言曉者規畫為圖以示之
至衆家之說有所不通則間述已見以附於下如舊圖
舊說已備者不復贅出其有未盡則隨條辨析焉歲
月積累寢成卷帙乃次其顛末以便考尋名曰尚書通
考竊謂學有本末道無精粗禮樂官名聖人猶問則讀
是經者安得不求其故哉方將就正於博洽君子然後

退授於家俾為格致之助亦庶乎紫陽夫子之教云爾
陳暘谷先生士元

陳士元邵武人與黃鎮成同時以文為友隱居不仕有
武陽志略武陽耆舊詩宗學者號暘谷先生黃氏鎮成
撰武陽耆舊宗唐詩集序曰宗唐詩者武陽耆舊之所
作也詩以唐為宗詩至唐而備也蓋自唐虞賡歌為雅
頌之正至五子之歌有風人之旨三百篇源流在是下
至楚騷漢魏而流於六朝至唐復起開元天寶之間極

盛矣一本溫柔敦厚雄渾悲壯而忠臣孝子之情傷今懷古之意隱然見於言外可以諷誦而得之矣宋諸大家務自出機軸而以辨博迫切為詩去風雅頌反遠矣及其弊也復有一類衰陋破碎之辭相尚為奇豈不為詩之厄哉吾鄉自滄浪嚴氏奮臂特起折衷古今凡所論辨有前輩所未及者一時同志之士更唱迭和以唐為宗而詩道復昌矣是時家各有集惜行世未久海田換代六丁取將暘谷陳君士元網羅放失得數十家

大懼湮沒俾鎮成斐取十一刊刻傳遠一以見一代詩宗之盛一以見吾邦文物之懿陳君是心可不謂賢者我朝文治復古諸名家傑作齊驅盛唐是編之行適其逢也敢述卷端

提舉黃子肅先生清老

黃清老字子肅邵武人黃五經之後也通經博文元泰定四年進士累應奉翰林文字同知制誥國史院編修官遷奉訓大夫出為湖廣行省儒學提舉學者自遠從

之率多成就稱樵水先生著春秋經旨四書一貫數十卷詩存者數千篇有盛唐之風蘇天爵為作碑云

閩書經

義考

李玉林先生應龍

李應龍字玉林光澤人西山先生郁之後博學有節操為時師表至元間薦為白鹿洞書院山長及漳州路教授俱不赴所著有春秋纂例孝經集註四書講義

閩書

李先生學遜

李學遜邵武人忠定公九世孫也博學洽聞善天文尤
邃於易為文典雅有法所著有易精解中星儀象等圖
閩書

文學黃延美先生元實

黃元實字延美邵武人少酷嗜學性凝重寡言終日危
坐不少傾倚天歷初試浙闈中式授郡文學以剡薦未
授而歸邑有妖民為亂令延元實議討賊賊奄至遂遇
害

通志

黃退圃先生大昌 子公紹

黃大昌字退圃邵武人黃永存之孫隱德不仕所著有
兼山語錄子公紹字直翁宋咸淳元年進士所著有韻
會 閩書 邵武郡志 通志

危先生德華

危德華光澤人博覽經史不慕榮達善屬文精於詩按
志乘邑令金川姚伯和叙德華詩集畧曰予來宰是邦
得卓行之士一人曰危德華者孤介特立隱居北溪以

學業教授諸生不求聞達值元季喪亂草竊暴橫奔走
竄伏靡有寧日故其發言興懷未免悲憤激烈其所以
嫉奸邪崇節義尊君親上之心炳然著見於言意之表
噫先生家貧矣而其志益貞年艾矣而其詩益豪自非
養之有素者其能若是耶

邵武郡藝文志

閩書

嚴儀卿先生羽

嚴羽字丹丘一字儀卿邵武莒溪人自號滄浪逋客其
為人粹溫中有奇氣嘗問學於包克堂自風騷而下講

究深到即雜出古人之詩隱其姓名舉以相試悉能辨
別其世代門戶自號滄浪逋客有滄浪集二卷同族有
嚴仁好古博學嚴參號三休居士俱高尚世號三嚴云
羽詩雖祖唐人然其體裁勻密詞調清壯無一語軼繩
尺之外同時台人戴石屏深加獎重其子鳳山鳳山子
子野半山邑人上官閬風吳潛夫朱力菴吳半山黃則
山盛傳宗派殆與黃山谷江西詩派無異 閩書 郡志

按志乘載與滄浪論詩者同里有吳陵字景先上官
偉長號閬風山人吳夢易字潛夫朱正中字叔大號

力菴黃裳號則山正中子汝賢字志學俱以
詩鳴傳中所謂盛傳宗派者此數人餘俟考

閩中理學淵源考卷三十九

欽定四庫全書

閩中理學淵源考卷四十

廣平府知府李清馥撰

福寧陳石堂先生普學派

按經義考閩氏文振作傳曰石堂先生聞恂齋韓氏
倡道浙東負笈之會稽從之游韓之學出慶源輔氏
朱門高弟也淵源所自屹為嫡派故其學甚正嘗曰
聆韓先生夜誦四書如奏九韶令人不知肉味故其

用功本諸四書四書通然後求之六經云又張清恪
公困學錄曰石堂學求自得其用功求之六經不貴
文辭不急利祿惟真知實踐求無愧于聖賢馥嘗考
先生在莆十八年受徒講學晚年所造益高出其門
者皆能衍續其緒餘讀字義諸編可見源流所本矣

陳石堂先生普

陳普字尚德別號懼齋寧德之石塘人所居有石堂山
學者稱石堂先生初淳熙間朱文公過石塘異其風土

曰後數十年此中當出儒者能讀天下書十八九普生
當理宗淳祐甲辰鷓鴣百數繞屋稍長入鄉塾有大人
志聞韓翼甫倡道浙東負笈從遊韓之學出慶源輔氏
輔朱門高弟也宋鼎既移決意卷藏朝廷三使辟為本省
教授不起開門授徒歸然以斯道自任四方及門歲數
百人館里之仁峯僧舍至不能容建州劉純父聘主雲
莊書院熊勿軒留講鰲峯丞相劉文簡屬脩黃楊二家
喪祭禮因并晦庵所纂為三十卷尋講饒廣在德興初

庵書院尤久嘗與游翁山范天碧謝子詳極論太極之
旨晚在莆中十有八年造就益衆出其門者如韓信同
楊琬余載黃裳輩並以正學為時所宗嘗曰性命道德
五常誠敬等字在四書六經中如斗極列宿之在天五
嶽四瀆之在地舍此不求更學何事少壯時銳然有經
世志謂三代之治莫善井田作書數千言欲上於朝屬
不仕而止著字義一卷凡百五十三字出授門人識者
謂此之程正思陳安卿詳畧適中而立義措辭為尤精

又有四書句解鈴鍵學庸旨要孟子纂圖周易解尚書
補微四書六經講義渾天儀論天象賦詠史詩斷凡數
百卷元延祐乙卯卒於家年七十二

論著

叙禮論畧曰某年十五六讀曲禮少儀知愛之而淪於
時俗科舉之習三十四始脫時文而患難屢遭東西
奔走頗聞熊去非自少用心禮樂而貧踪賤武合并良
難丁酉歲受平山劉純父之招始見去非於山中書冊

填坐屢空晏如覽記浩博會欲求輔於朋友備書冊闕
室堂廣談論取晦翁黃楊之書脩補以示方來而未就也
顧余雖志求古而未嘗涉晦翁黃楊之藩輒用去非成
規更為求要質鬼神告白知友共取十七篇注疏及晦
翁所釐三十五卷勉齋信齋喪祭二禮及圖循去非熟
路詳加考訂重為比類云

楊先生琬

楊琬未詳待考

黃先生裳

黃裳未詳待考

丘先生和仲

丘和仲按石堂先生字義序中畧云乙巳歲樵丘叔文之仲子和仲年十七從余學每講說遇此等字必為之深論而多言之和仲每聞輒悚然察其貌若有以真契默會而自得於問答之外者雖蒙其家學源流端的決洽是亦其所受於天者清厚與等夷異故也讀序中知

和仲屬邵武人其家學源流待考餘詳字義原文

余先生載

余載按余氏載石堂字義序識後云先師舊學於浙維則韓氏翼甫韓氏學於朱門之輔氏蓋問學淵源厥有自來嘗語云疇昔子聆韓先生夜旦莊誦朱子四書如奏九成蕭韶令人不知肉味又云性命道德五常誠敬等字在六經四書中如斗極列宿之在天五嶽四瀆之在地非深於知道者未易為斯言又嘗述字義一卷以

授學者云後繫云泰定乙丑八月戊寅門人合沙余載
謹識讀余氏此序知先生為三山人其事跡待考餘詳
余氏載原識後

韓伯循先生信同學派

宋季老成凋落一二典型抱道深山如存碩果求有
教席聲應之雅不可以多數也福寧僻在濱海鼎革
之後絃誦不衰諸賢猶能公其道以傳其人以是知
大賢過化之澤所貽遠矣

韓伯循先生信同

韓信同字伯循福寧州人幼穎悟工詩文既壯受業陳石堂遂刊落華藻究心濂洛關閩之學陳嘆曰吾耄矣得斯人飲水俟命復何恨哉延祐四年應江浙舉不合歸即杜門不出自是四方書幣日至弟子請業者戶外屢滿著四書標註書經疏文三禮易經旁註書解集史

類纂及詩文十卷

閩書

道南源委

鄭先生議

鄭轍字子乘福寧人總角時即與林珙受業於韓公信
同韓公嘗稱曰福寧二君可續吾閩五賢理學韓卒二
君俱心喪三年著有詩文集

閩書

道南源委

訓導林仲恭先生珙

林珙字仲恭福寧人少從韓公信同游篤信力行為文
以理勝舉明經不受強補本州訓導未半載以疾辭晚
年授生徒以開來學為己任

閩書

道南源委

黃吉甫諸先生學派

按吉甫諸賢或以文學該博志學精專或以礪行修
名託志風雅如謝氏臯羽父子鄭氏邦壽皆名教中
卓然有立者歟欲以詩人嘯咏觀之殆未可同年語
矣餘皆出處凜然可以扶持教道者今錄其著者載
於篇

黃吉甫先生履翁

黃履翁字吉甫寧德人學問該博以林駟所著源流至
論未備復為彙纂別集一十卷

閩書

進士孫先生駢

孫駢寧德人少入太學同舍生俞晰善經學駢師事之
既登進士官浙中猶造晰廬考業既老務學如年少至
正三十年掌本縣教事

閩書

進士林景和先生仲節

林仲節字景和福寧人少聰敏領解浙江舉泰定進士
有書經義四靈賦行世

陳貢父先生自新

陳自新字貢父號敬齋福寧州人通五經精易本傳義而推行以皇極經世從遊者甚衆著有起興集等書行世
道南源委

靖節鄭邦壽先生君孝

鄭君孝字邦壽福寧人年十七舉咸淳進士朝士交薦竟不起家庭孝謹內外無間言後進多師之及卒學者私謚之曰靖節先生著五經解疑梅壑集

通志

黃洵饒先生寬

黃寬字洵饒福寧人力學古文耿介自重能怡其親世
亂避兵歸益貧父母兄嫂四喪不能葬以憂感卒無後
袁天祿并其四喪葬之於石潭宣城貢師泰為誌銘所
著有四書附纂時事直紀

閩書

鄭伯直先生忠

鄭忠字伯直雅好經術或勸之仕曰山林朝市其趨一
也著家訓畧曰讀書修德以清白為世規力田務農以
勤儉為家法

閩書

謝君啟先生鎬子翺

謝鎬字君啟福寧人性至孝居父母喪哀毀廬墓終身
不仕方氏鳳曰謝君臯羽其父鎬以春秋學為婦翁繆
正字烈所器重嘗著春秋衍義十卷左氏辨證六卷藏
於家子翺別有傳

道南源委

閩書

經義考

謝翺字臯羽福寧之長溪人後徙建之浦城父鎬性至
孝著春秋衍義左氏辨證傳於時翺世其學咸淳初試
進士不第慨然求諸古以文章名家落魄漳泉二州間

信公文天祥逾海至閩開府延平檄州郡大舉勤王之
師翺傾家貲率鄉兵數百人赴難長揖軍門遂參軍事
聲連梁楚已別去宋亡天祥被執翺匿民間流離久之
間行抵勾越多開閱故大族而王監簿諸人方延致游
士日以賦詠相娛樂翺時出所長諸公見者皆自以為
不及不知其為天祥客也然終不自明且念久不去人
將虞我矣乃去而之越之南鄙依浦陽江方鳳時永康
吳思齊亦依鳳居三人無變志又皆高年遂俱客吳氏

里中得其餘日以自適一不問當世事翺嘗上會稽循
山左右窺祐思諸陵西走吳會東入鄞過蛟門臨大海
所至歔歔流涕晚愛睦州山水浮七里瀨登嚴子陵釣
臺設天祥主北向舉酒再拜號哭以竹如意擊石歌曰
魂朝往兮何極暮歸來兮關水黑化為朱鳥兮有味焉
食歌已竹石俱碎失聲哭人莫詰其誰何惟鳳與思齊
深悲之初江端友呂居仁朱翌辟地白雲源源故方干
所居在釣臺之南翺率其徒游焉願即此為塋地作許

劍錄及翺居錢唐至元乙未病革語其妻劉曰我死必
以骨歸方鳳葬我許劍之地鳳聞訃訖如其言與吳思

齊方幼學方濤馮桂芳翁登登弟衡葬翺于陵臺南以

文橐殉伐石表之曰粵謝翺墓

方鳳字韶卿由太學生授容州教授治毛氏詩

同郡黃潛柳贊皆出其門吳思齊字子善其學本之外祖陳亮用蔭補官攝嘉興丞數以書干朱臣用事者遇事不以富移不以貧屈自號全歸子翺素慕屈平託遠遊自號晞髮子每

執筆時瞑目遐思身與天地俱忘語人曰用志不分鬼神將避之明胡氏仲申稱其論著之文辭隱指微大要

類其行事閩書何氏鏡山撰稱其詩直遡盛唐以上卓
有風人之餘文蘄拔峭勁雷電恍惚出入風雨中發睦
人士翕然從之至元甲午去家武林西浙乙未卒年四
十七

閩書

明胡仲申撰傳

宋詩抄

撫漕繆允成先生烈

繆烈字允成福安人嗜學孝親上舍省試皆第一舉進
士添差福州教授日率子弟講明正學遷正字授撫漕
侍郎著春秋講義仲山集

閩書

林先生天書

林天書名詔以字行福寧人勵行濟貧咸淳四年授晉
江尉思尼父不入危邦之訓以疾乞歸後八年宋亡元
初屢薦不起

閩書

閩中理學淵源考卷四十